

Iwwer die Ende

Om letzte Sunndaachmoie hadde merr vorm Friehschoppe unne om Moo gestonne. Was halder dann vom Fussball?, hott de Karl gefroocht, hätte die Deutsche so gespilt wie die Grieche, dann wärnse nit erausgeflooche.

De Völler dut merr laad, sacht de Schorsch, die Millionebuwe nit.

De Karl guckt mich oo: Unn du, Honnes, was moonsden du?

Ich habb die Achsele gezuckt: Nix. Weil ich habb die gonz Zeit dene Leit doo vorne zugeguckt: Die wolle die Ende füttern unn mache debei nor die Rawe satt.

De Karl hott e ungläubisch Gesicht gemacht: Die Rawe?

Ja die Rawe, sach ich, odder besser die Krähe. De Fritz hott merr erzählt ...

Was fern Fritz? hott de Schorsch gefroocht, iss dess der mettem Dalmatiner?

Ja genau, gebb ich zur Antwort, doo hawwe doch die vom Bund so enn Satz Endekücke aus de Klowerstrooß mett vill Uffwond in de Moo verfracht – unn de Fritz hott merr erzählt, dass zwaa Daach später die Kücke allminonner von de Rawe gefresse warn, wie all die onnern junge Ende aach. Er hott selbst gesehe, wie die Rawe sich die Kücke gegriffe hawwe – direkt vom Wasser! Hier konnsde halt aach saache: Die wolle die Ende füttern unn mache debei nor die Rawe satt.

De Schorsch frächt: Was häddese dann mache solle, die vom Bund? Merr kann nit immer nor meckern.

Ich druff: De Fritz hott nit nor gemeckert, der hott aach enn Vorschlaach gemacht, nämlich die Kücke irchendwo enoi ze setze unn e paar Daach wachse ze losse, dann wärnse groß genuch unn kennde von de Rawe nimmi geschlaache werrn.

Doo moont de Karl: Doo wolle Mensche dene Oone was Gutes due, verhelpfe awwer doodemett Onnern zu Reibach - odder korz gesacht: Die wolle die Ende füttern unn mache debei nor die Rawe satt! Den Satz kennd merr efter oowende.

Ich grins: Zum Beispiel bei de Wind-Oolaach in Wicker. Unn trotzdem: Was ich nit versteh, iss dasse in Flerschem so geeche die Windkraft sinn, awwer aach nix onnerst mache.

De Schorsch guckt mich oo: Ja, was sollese dann mache?

Ich sach: Merr kann nit immer nur geeche was soi, merr muss aach emol ferr ebbes soi. Warum sacht merr in Flerschem nit, naa, die Wind-Oolaach bringt nix, awwer mir mache was onnerst, mir mache uffs Dach von de Stadthall e groß Solaranlaach ferr Solarstrom - odder mir baue e Tonkstell ferr Erd- odder Flüssichgas unn losse gleich emol drei Audos umbaue die mett Gas fahrn kenne? Dess wär doch e Antwort uff die, die glaawe, die Probleme mette Energie

dorch Windmiehle aus de Welt schaffe ze könne. Nit immer nor „Naa!“ saache, sondern efter emol „Awwer!“

De Karl guckt zum Hersch enuff: Losse merrs, geh merr, ich habb Dorscht.

Korz vor de Trepp iss de Schorsch steh gebliwwe: Wie sinn merr dann eichtlich uff die Windmiehl kumme, mir haddes doch vom Fußball?

De Karl druff. Ei weil de Honnes geguckt hott, wie die Leit die Ende füttern.

Doo sach ich: Weils mettem Wind so ähnlich iss wie hier mette Ende: Merr muss monches onnerst mache. Villeicht könnt die Wickerer Windmiehl joo Wasser in Wasserstoff unn Sauerstoff zerleeche – waaß merrs? Im Aacheblick awwer konnsde iwwer dess Ding nix onnerst sache als: Die wolle die Ende füttern unn mache debei nor die Rawe satt.

Eiern Honnes